

**MESYUARAT KEDUA PENGGAL KEDUA  
DEWAN UNDANGAN NEGERI PULAU PINANG  
YANG KELIMA BELAS  
22 NOVEMBER 2024**

**PERKARA : 5(B)28**

**SOALAN LISAN OLEH AHLI KAWASAN MACHANG BUBUK  
YB LEE KHAI LOON**

28. Sukan Asia Tenggara (SEA) 2027.

- (a) Berapakah anggaran kos penganjuran yang perlu ditanggung oleh Pulau Pinang serta anggaran keuntungan atau impak ekonomi yang dapat dijana?
- (b) Senaraikan acara sukan yang akan diadakan di Pulau Pinang mengikut lokasi dan taraf kemudahan sukan.
- (c) Terangkan inisiatif membangun bakat sukan di negeri bagi memenangi pingat.

**YB GOOI ZI SEN  
MENJAWAB BAGI PIHAK YAB KETUA MENTERI**

28. Kementerian Belia dan Sukan (KBS) telah mengumumkan keputusan Kerajaan Malaysia untuk menerima tawaran daripada Persekutuan Sukan SEA (SEAGF) bagi menjadi tuan rumah temasya Sukan SEA 2027. Beberapa negeri juga telah menawarkan bagi menjadi sebahagian penganjur sukan antaranya Kuala Lumpur, Sarawak dan Pulau Pinang.

- (a) Kerajaan Negeri melalui keputusan Mesyuarat Majlis Mesyuarat Kerajaan (MMK) telah bersetuju untuk memperuntukkan sejumlah RM15.0 juta bagi penganjuran

sukan snuker dan *billiard* semasa Sukan SEA 2027 yang akan datang. Namun pada peringkat ini, Kementerian Belia dan Sukan menerusi Jawatankuasa Penganjuran sedang memperhalusi cadangan untuk menawarkan beberapa sukan tambahan jenis *indoor* yang lain kepada Pulau Pinang menerusi jumlah peruntukan yang dipersetujui. Perkara ini akan turut mengambil kira kesesuaian kemudahan sukan sedia ada yang terdapat di Pulau Pinang.

Melalui penganjuran acara sukan bertaraf antarabangsa, ia bakal membantu meningkatkan pertumbuhan ekonomi tempatan melalui pelancongan, penjualan tiket, penajaan korporat dan juga meningkatkan imej dan reputasi negeri serta negara di peringkat global. Menurut Lembaga Pembangunan Pelaburan Malaysia (MIDA), pelancongan sukan mempunyai keupayaan untuk menjana pendapatan yang dianggarkan pada RM5 billion setiap tahun untuk Malaysia.

- (b) Kerajaan Negeri telah menghantar permohonan bagi menganjurkan Sukan Snuker bertempat di Akademi *Billiard* dan Snuker Wilayah Utara di Bayan Baru kepada Kementerian Belia dan Sukan. Akademi ini juga mempunyai kemudahan

sukan lain (dari Setia Spice Arena) dan kemudahan penginapan di lokaliti serta aktiviti ekonomi setempat yang strategik. Namun demikian, perbincangan selanjutnya akan diadakan bersama dengan Kementerian Belia dan Sukan (KBS) serta negeri-negeri penganjur yang lain bagi memuktamadkan acara sukan serta lokasi yang terlibat di Negeri Pulau Pinang.

- (c) Pelbagai inisiatif telah dilaksanakan oleh Majlis Sukan Negeri Pulau Pinang (MSNPP) bersama Persatuan Sukan Negeri dan Jabatan Pendidikan Negeri Pulau Pinang bagi membangunkan sukan serta atlet-atlet di negeri ini. Seterusnya, inisiatif ini mampu membawa atlet yang berbakat ke temasya Sukan Malaysia melalui pemilihan dan diserap mengikuti program latihan kebangsaan di bawah program pembangunan Majlis Sukan Negara Malaysia dan Persatuan Sukan Kebangsaan. Antara usaha-usaha yang dilakukan adalah:

- (i) Memberikan latihan berterusan seperti menyediakan program latihan yang berstruktur dan berterusan untuk

memastikan atlet sentiasa memperbaiki kemahiran mereka;

- (ii) Menyediakan fasiliti sukan yang lengkap seperti menyediakan kemudahan sukan yang lengkap dan berkualiti tinggi untuk atlet berlatih;
- (iii) Menyediakan jurulatih yang bertauliah, berkelayakan dan profesional serta berpengalaman untuk membimbing atlet dalam teknik, taktikal dan strategi sukan;
- (iv) Menjaga kesihatan atlet-atlet negeri dengan memastikan atlet mendapat nasihat pemakanan yang betul serta akses kepada perkhidmatan kesihatan dan fisioterapi;
- (v) Memberi peluang kepada atlet untuk menyertai pertandingan di pelbagai peringkat, dari peringkat sekolah hingga antarabangsa;

- (vi) Menerapkan pendidikan mengenai sukan, termasuk sejarah, psikologi, dan strategi sukan untuk melengkapkan atlet dengan pengetahuan yang lebih mendalam;
- (vii) Menampung kos latihan, peralatan dan pertandingan para atlet;
- (viii) Menyediakan program *mentorship* di mana atlet *senior* boleh membimbing dan memberi motivasi kepada atlet muda; dan
- (ix) Menyediakan sokongan psikologi untuk membantu atlet mengatasi tekanan dan cabaran yang mereka hadapi.

Dengan mengambil langkah-langkah ini, Negeri Pulau Pinang dapat memastikan bahawa atlet-atlet muda mempunyai platform yang kuat bagi mencapai kejayaan dalam sukan masing-masing. Usaha ini adalah selari dengan usaha Majlis Sukan Negeri Se-Malaysia dalam memastikan Pasukan Kebangsaan Negara sentiasa mempunyai bilangan atlet pelapis dan atlet sukan yang terbaik di peringkat

negara untuk meraih kemenangan di pentas sukan antarabangsa meliputi Sukan SEA, Sukan Asia, Sukan Komanwel, Sukan Dunia dan Sukan Olimpik.